

Monday, March 16, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

SESSION-CM

Chief Minister Pu Lalduhoman Lengpui Airport chu Airport Authority of India (AAI) hnena hlan turin hmalakna a kal mek a ti.

Vawiin Assembly Budget Session thukhawm hnunung bera zawhna chhangin GAD changtu ni bawk Chief Minister chuan, Lengpui leh Sihphir ram IAF-in an lei leh Lengpui Airtport chuan inzawmna a neih lo a, tuna IAF-in ram an lei hi airport tan a ni lo a, Sihphir rama radar vuah nan a ni daih a, airport nen inkaihnhawihna pakhatmah a nei lo, a ti a; Airport chungchangah chuan sorkar hmasa atangin rei tak indawrna a kal tawh thu leh tunah hian AAI hnena hlan turin hmalakna a kal mek a ti a ni.

Pu Lalduhoma chuan Lengpui Airport in hlan tur chungchangah AAI nen an indawrnaah pek theih a chhia a, sorkar hmasa kal tawh te nen chu chutiang tho chu a ni a, IAF lam erawhin an be tha em em a, amaherawhchu NGO-CC leh party dangten AAI hnenah hlan tur a ni an tih tak tlat avang khan IAF chu an dawr zui tawh lo a. Airport chungchangah chuan AAI nen char char an indawr ta a ni a ti.

Pu Lalduhoma chuan AAI lam hian tuna Lengpui Airport-a building awmte hlutna an chhut mek thu sawiin a hlutna hi engzatnge a nih dawn la hriat chiah lo mah se, an rawn chhut chhuah turah hian lungawi mai an tum loh thu a sawi a; kha leh chen sorkar kaltate atangin capital investment tam tak sen a ni tawh a, tlawm lutuka pek ringawt an tum bik lo a ti.



HOME MINISTER

Home Minister Pu K Sapdangan Saipum rama Assam lam miten lo an vah chungchangah an tih theih ang chu an tih nghal vek a ti a, Border Out Post (BOP)-te cheithat mek a ni a, police duty an kir leh thuai beisei a ni a ti.

Vawiin Assembly Session-ah zawhna chhangin Pu K Sapdanga chuan, Saipum rama lo vah hi an lo hriat ngai loh thu leh kumin January leh February thla tir lama mi niawma a lan thu a sawi a, Home department demand sawi ni khan complaint a lut a, Kolasib DC address-a ziah ni mahse complaint hi aman a dawng hmasaa, engemaw thil tum neia tih a nih a rin loh thu a sawi rualin, ramri chungchang a nih avangin a bengvar apiang inhrilha tanrual a tul a ti.

Pu K Sapdanga chuan complaint an dawn veleh Kolasib DC an hrilh nghal a, a hmunah Kolasib DC leh SP-te an kal nghal a, BoP atangin darkar 4 lai kea kal ngai a ni a. An teh danah chuan tin 70-80 hmun vela zau a ni a, a vat tute hi umzui zel an ni. Silchar DC hnenah report nghal niin, hma la chhunzawm lo tura hriattir a ni, a ti a; report an dawn ni hian an tih theih ang chu an tih nghal vek tih sawiin, Silchar DC pawhin Mizoram sorkar hriattirna chu zawm a intiam tih a sawi bawk.

BoP hi tun hnaiah chuan withdraw a awm loh thu leh withdraw hnunung ber chu kum 2023 kha anih thu Home Minister chuan a sawi a, loh theih lohna thila a

hmun siamthat ngaite a ni a, hengte hi thawmthat mek niin, police duty an kir leh thuai beisei a ni a ti.



MUCHS

Chief Minister Pu Lalduhoman vawiin khan Assembly Annexe Conference Hall-ah Mizoram Universal Healthcare Scheme (MUHCS) 2 point 0 a tlangzarh a, hemi rual hian MUCHS 2.0 leh MUHCS chungchanga hriatchian duh neite leh harsatna thlenna tur dedicated call centre 'MUHCS Chhawntu' a tlangzarh nghal.

Chief minister Pu Lalduhoma chuan sorkar kumthar lo awm turah MUHCS 2.0 atan hian cheng vbc 130 dah a nih thu a sawi a; MUHCS 2.0 ah hian empanelled hospital ni loa in-refer dan chu khauh zawka kalpui a nih tawh dawn thu sawiin, in refer hi MUSHC 1.0-ah hman sual a nih nasat avangin MUHCS 2.0-ah chuan ICU- a admit nghal ngai damlote, nunna chhan nana zai nghal ngai leh accident avanga zai nghal ngaite chauh refer theih an nih tawh dawn a ti.

(BYTE)

Mizoram State Healthcare Society-in an tarlan danin, MUHCS hnuaiah hian vawiin thlengin bill atan cheng vbc 157 point 61 a pechhuak tawh a, AB PM-JAY golden card hmangtute tan cheng vbc 56 point 82 pek a ni tawh a ni.

MUHCS 2.0 atana inziahlun hun hi thla hmasa February ni 16 atang khan hawn tan niin kalpui mek a ni a, thla thar April ni 15 thleng hawn a ni ang. MUHCS 2.0 atana inziah lunna hi hmun tam zawkah online-a kalpui a ni a, internet that lohna khua engemaw zat ah erawh offline-in inziah lunna hi kalpui a ni. Inziah lun hun pangngaia inziak lut remchang lo tan sorkar chuan June thlaah khawngaihna hun a hawng leh dawn a, grace period a inziah lunna man erawh chu inziah lun man pangngai aiin za zela 50-in a san belh thung ang.

Mipui ten scheme chungchang an hriat chian duh zawhfiahna atan leh scheme hman kawnga harsatna an neihte an thlenna atan Mizoram State Health Care Society hnuaiah dedicated Call Centre "MUHCS Chhawntu" din fel tawh niin, phone number 08065293906-ah biak pawh theih a ni.



JAL JARPAN DIWAS

Vawiin khan Chhawrtui khuaah Chhawrtui khaw tui lak lawmna leh inhlanna Jal Arpan Diwas hman a ni a.

He huna tarlan anih danin, JJM hnuaiah Chhawrtui khuaah hian tui connection a thlawnin 254 pek a ni a, Solar pumping hmangin Rangte lui hi stage hnih (2) a pump chhuah niin, metre 630 a sang a ni. Chhawrtui khua hi Har Ghar Jal Village a puan tawh a ni a, Financial year 2025-2026 atan Jal seva Ankalaan Assessment lak tawh niin, Jal Seeva Ankalaan Citizen Feedback pawh mi engemawzahin an ti tawh bawk.

He hun kaihruaitu Pu Lalrinsanga WATSAN Chairman hoin kalkhawmten tuihna humhalh turin thutiam an la a ni.

